



## Волаң Ляльн нох питама хатл

**Пора йи хаңал, хатлат сора манлат. Тампуш 81 тал хаңас, хоты шоши хоятлув Волаң Ляльн нох питсат. Муң, ям сыстам тураман улты мохет, лувилал нумдалув...**

Волаң Ляльн нох питты ураңна, шоши хоятлув ищи ар юр понтсат. Хойтат ёдан усат, ар рупитсат. Няврэмат, нэңат, пирац хоятат иса муй верытсат па муй хошсат, щит версат. Асан худ велпасласат, унтан рых акатсат па вой велсат. Нэңат хошам сохат ёнтсат. Ёх па, нёхи хорсат. Щи лэңатом отат иса ун ляля китыдысайт. Солтанат лапаттыя па думаттыя моссат. Кемелан нётсат.

Мет даварт ус, хота ищки муватан хоятлув немшчат пидан ляляссат. Щи ищки муватан муң шимлаң рут хоятлув мет яма, мув уйтман немшчат пидан ешацсат. Муй арат нёттап вулэң ухлат версат – тохи нёлдат, щеляйт па мосты порма-

сат талсат, ёхды па мушмалтам солтанат тусат. Ун аплак хуват туп вулэң ухлат туңа-щира яңхты верытсат.

Щи ар юр верам ураңна, уйтантопсайт лэңатлайт. Потарла, хоты муң шоши шимлаң рут мир хоятлув, хантэт, ур ёх па саранат ар юр понман ляльн нох питты нётсат. Кашң районэв па куртэв элты хоятлув ляля яңхсат. Щит элты шоши хоятлув потарлат. Тамара Александровна Пырысева каматса тал йи тахая актас па ханшас, хой Ёханов па Ёханкурт элты ляля яңхас, хой ёхды ёхтас па хой щита паратса. Актам отлаң йи нэпека ханшсалды. Кашң хоят элты нумты мосал. Щиты лув морт арат хоят элты нэпек



Хор: Иван Сандрин

ханшас. Лув юрал понман 2022-мет талн Ёханован памятник лэңатса. Щи кев элты верам памятникан ханшман улда, хой

щилта ляля яңхас. Энамты хоятат ат луңатлат па уйтлат, муй хорпи лув опрацдал усат...

### «Бессмертный полк» шушад...

**Алаңсахат элты, Ас нопатты тылац 9-мет хатлаң, кашң куртан хоятат ёшлалн хорат каталдат. Щи хоратн лув опрацдал понман улдат, хойтат Волаң Ляля яңхсат.**

Лувилал нумман, лув ияха, вошхулэт хуват шушлат. Кашң семья атом ляль хойдыйс. Тата Инна Лонгортова опрацдал элты потар тус.

– Ма семьяем элты хоятат ищи ляля тутдысайт, – Инна Романовна Лонгортова потартал. – Ма ун ащем яйл, Иван Алексеевич Севли, ханты нэмл – Пещат ху ики, 1897-мет талн сэма питмал. Колхоз «Красный путь» хоца бригадира рупитмал. 1940-мет талн лув, яма рупитмал ураңан, Москва воша Всероссийской сельскохозяйственной выставка китыдыйм. Лув нэпекалн ханшам: «Тов. Севли по национальности хантэ, малограмотный, беспартийный, член колхоза с 1936 года, всё время работал бригадиром рыболовецкой бригады. Бригада, руководимая тов. Севли, систематически перевыполняет план рыбодобычи...». Щиты

лув яма рупитсат, па ешаул, ун ляля яңхатсайт. Иван акем Няняңкурт элты 1942-мет талн ляля туса. Лув щита каматса тал лялясас. Латвия мувн, Рига нэмпи вош пуңалн, лув артан немшчат паратсалды. Щиты лув елды питсат. 1945-мет талн лув мушмалда па ёхи эсалда. Иван акем холна худам апщи таймал – Никита, Яков па мет ай, ищи Иван. Лув ляля манамн кимет нэм таймал, хун нэпека ханшты питама, па Ивана ханшам. Щиты кат Иван, яй па апщи сакңан, усңан. Ляль элты ёхды ёхтам юпина, лув хоты утлам щиралн,

елды худ велпасламан рупитты питас. 1962-мет талн лув антома ювмал. Ёханован лоттаман ул.

Кимет опрацл, Семён Павлович Севли, 1910-мет талн Няняңкуртан сэма питас. Ищи худ велман рупитас. Щёхар тылацн 1941-мет талн ляля туса. Щи порайн лувел хольмаң молтас тал улмал. Ленинградской фронтан лялясас. Юбилейной мевал посат артан тайс. Лув ищки пораян, 1943-мет талн, Егор Иванович Романов пидн ляль элты ёхатсаңан. Кинамтак мушмалтамңан, госпиталыан ямашак ювман юпина ёхи китамңан.

Ёхи ёхатман юпийн, елды рупитты питсаңан. Семён Павлович луңан худ велас. Пенсияя этам юпина, Мужевской рыбкоопан, ловн пормасат талдыман рупитты питас.

– Хун ма ай усам, ащем потартас, лув Сойм папелак икия аялса, ун хоятатан па Куца ху икия аялса, – Инна Лонгортова ястал. – 1981-мет талн лув антома йис. Ищи Ёханован ил лоттаса. Щи тумпина, холна хут рут хоятэм ляля китыдыса. 1945-мет талн ма ун ащем, Егор Павлович Севли, ищи ляля китам. Ма ун аңкем потартыйс, лувел няврэмдал пидан шеңк даварт ус. Щи порайн ма ащем кат тал доват улмал. Ун ащем Омск вош педа китыдыйм. Щилта лув Ас нопатты 9-мет хатл юпина ёхи ёхтас. Хун ляль етшас, хоятат аматман миллаң нох ёвалты питсалдал, ун ащем па нумасмал: «Муя па ма милэм ёвалты питлэм? Хойна па щимац хошам милна мадаям. Талн ищки ант ул».



Хор: Иван Сандрин

Иван Сандрин  
ханшам потардаң

# Пухар Кева яңхам ёх

Там ванан Ләпатнаңк вошан улты айдат ёх Поур-Кеу нәмпи кев доңда худжилдысат. Волаң Ляльн нох питам хатл постаты кеша, лув щита, лялян тайм Вотвой урты щашкан лакки даршитсәд па хоят такды яңхты тохдаң пормас (хоп) элты, нумалта хора вусәд.

Кев доңда мантыйн, апраң няврәмат кутан, ханты эвет-похат па усат. Щи кут па Зоя Ильинична Макарова няврәмлаң хоша воша, Овкурт элты ёхтылдыс. Айкел худмал порайн, лув па юша актащты питас. Еша кеша айдат ёх, нийлъяң педа вет тала ювам ун имев ёлта хун хашал.

«Ун кер тыдащ хольмаң педа ветмет хатадан карты юш хуват яңхты тутаң хопан Собь станция унты мантсув па етна пелка, куран, Восты кев хул унты ёхтаптысув. Щита холсув. Кимет хатл, алаңсахат, вет щёсан нох килсув, шай йинцсув па Поур-Кеу кев педа юша этсув. Ханты щиран Пухар Кева аялда. Тухал няврәмат дохан мантсат, хойтат па шушты юх ёшан тайман, куран шушсат. Муң хоттәд щиран вет хоят: ма, Ваня ийикем, ийикем Настя апщел, Роман веңал па няврәмлаң ун аңки, Зоя Ильинична, ищи муң пилэван яңхас. Иван ванан манман, аңкел



Хор: Юлия Макарова

иса элты вантман тайсалды. Ун аңкев лув шушты кемалан няврәмат пилан щиты щи шушас, ёлта ант хацилдыс. Руц няврәмат оцхуль сәман вантсат па ун аңкев иса инцас-сат, мосаң лув метас? Ма хоты лыпеман амтатдысам: – Няврәмлаң ун аңки мет юраң

па каркам. Манты юшал патәд унты тулды. Талдаң хоша муй вер ул. Лув педайл вантман, муң па кентат шушсув», – Зоя Ильинична меныл, Юлия Макарова ястас.

Зоя Ильинична, холна ар пуш кум ат шитлаң няврәмлаң пилан щутщаты яңхты. Шушты юшлан пайды па туңат ат улдат. Так ёш, так кур, тумтак уда.

## Нётапса ох шитты вер



Хор: Антон Русмиленко

Овс мув шимлаң мир айдат ёх кеша, нётапса ох шитты ураңан, кашң тал касапса верла. Щимащ нётты вер 2021-мет тал элты рупитты питас. Учёной хоят педа уталтыты айдат ёх, ёра верәд елды хаталтаты ураңан, грант ох ёша пайтты верытлат.

Антон Константинович Русмиленко учёной нәм шитаптаман Технологической институт Тюменской индустриальной университетан аспиранта нядмет курсан уталтыйл. Щита уталтыман лув рупата ханшал, тал юшат верты порайн, муй хорпи доңц ил нёратты па така верты машина мосаң па муй щиран лув рупитты верал ул.

Лув нәпека ханшам рупатайл, вер верты порайн вантты ураңан, грант шитты касапсайн нядмет пуш ох ёша пайтылдыл. Тампуш шитам охдалан па, еңта пасан верты уйтантопсаята яңхал. Щита лув щимащ рупата туты оша хоятат худантал, уталтыйл па оша паятал, туты верал муй щиран ямашак туңматты.

Тамащ нётапса ох кашң хоят верытал шитты. Щи кеша там номер хуват 8 (34922) 6-70-23 потрәматты рахал па Овс мув шимлаң мир хоятат департаментан специалиста рупитты Алексей Анатольевич Лонгортов инцасты, муй щиран нәпекат вер щира ләщатты.

## Каш верам хар

Волаң Ляльн нох питам хатл постаты лепан, Овкуртан улты ляль пора няврәмат па пенсияя манам хоятат кеша, каш альты харат даршитсайт.

Пиращ хоятат каш этадтаты хота ант шушты ураңан, каш ләщатты хотан рупитты нәңат ун хоятлаң улты хот овата ёхатсат. Каш ләщатам «Реченька» па «Культбригада» нәмпи группайнаң пиращ хоятлаң ещалт ляль пора арат арысат, яксат, мойлапса ясәң потарсат, ун хоятлаң мойлаптаслаң.

Ун хоятлув пилан, ванан улты куртаң мохилаң, СВО хара яңхам ёх, хорам, сыйң концерт вантты па этдысат.

Ляль порайн сәма питам, шукащман энмам па лаварт талатан рупитам хоятат нуптәд патәд унты ат туләд. Тумтака улдат. Няврәмлаңан, хилдылаңан, ван рут хоятлаңан шавиман ат тайлдайт.



Хор: Андрей Роктымов

Зоя Куртямова ханшам потрат

# Ляльн нох питам хатл элты айкел туты нэ

Волаң Ляльн нох питам емаң хатл 81-мет пуш постаты едпина Љоркуртаң нэңие, Наталья Марковна Русмиленко (Љонгортова), сэма питам хатлал постас.

Љув Ас нопатты тыдаң 5-мет хаталн 1945-мет талн, Ямал па Ёмвош кут вулы таш хотан, сэма питас. Щалта няд хатал хащал па Советской Союз доватан кашң радюва па кина хошапат хуват хув давдам ям айкел китса – Ляль етшас, атом немщат ёхи ракантсат! Щи юпийн ащелан «Ляльн нох питам хатл элты айкел туты нэңа» айлты питса.

## Ащел Волаң Ляля яңхас

Наталья ащел, Марк Кириллович Љонгортов 1916-мет талн, Оволаңкуртан сэма питас. Сус порайн 1942-мет талн ляля китам. Олда, Омской область Черёмушки нэмпи курта, солтан верат уталтыты китам. Нэпеклал хоца опрац нэмад ёвра ханшам – Љонгорт. Щиты солтан нэпекат хоца ханшман ул: «В именном списке личного состава маршевой стрелковой роты № 3380, сформированный 387 западный стрелковый полк и направленный в распоряжении числится под № 18, как Љонгорт Марк Кириллович. Особые отметки – жена Љонгорт (Шульгина) Аграфена Степановна». Љув, олаң Украинской фронт хоца, лялясас. Сталинград вош пуңадан шаншал такан мушмалса.

– Лялясты лотан ащем ещалт немщат элты танк хатты питас. Ащем элты манти утщиса. Љув муван ус лот кашалас па тохи навармас. Щи элты лаварт карты шуп манас, па мув лув пилэлан, ид нёртса, – ащел потартыйм ясңат Наталья Марковна нумалмийс. – Щи юпийн лув духаслалан мув ус элты нох талса па госпиталя китса. Щита лув талкем яммалтыйс па мохты ёхи китса. Ёхи йиты юшал шеңк хув улмал, туп товийн 1944-мет талн хотала ёхтас.

Волаң Ляльн лялясты верат элты Макар Кириллович шеңк ар ант потартыйс. Ям улапса педа уратас, ям потрат па йис монщат няврэмлала монщас. Ар рупитас, няврэмлал ищиты уталтас. Лялян моцатам нюламлал атом турам педа кашилдысат. Щиты мушитман лув, курк тыдаң 23-мет хаталн 1974-мет талн, антома йис.

## Айтэдан иса рупитас

Ай Наталья, 1953-мет талн Асов курт ашкудая, уталтыты туса. Щита лув нийл класс унты уталтыйл, елды па 9-10-мет класс Горка вошан етшаптал. Ай тэлн рупатая утлам щирн, мохты Горковской рыбозавод хоца худ вуйман рупитты манал.

– Муң, куртаң няврэмат, 13-мет тал элты колхозатан рупитты питсув: торан сэвар-



Наталья Марковна ийикел, Леонтий Иванович, па няврэмлал пилан: Семён, Людмила, Надежда па Вилянина.



Наталья Марковна Ростислав ай похиел па меньл пилан

сув, картопка омассув па нох акатсув. Љуң сыс сэврам па актам торны пайт Пулңават педа китыдысайт, – Наталья Русмиленко потартал. – Хун 7-мет класса мантсам, луң сыс, ма ферма хоца куца нэңа понылдысайм. Щиты кашң луң муң рупитысув. Щимащ пора ус.

Яңмет класс ашкуда етшамал юпийн, Наталья Марковна елды уталтыты, Пулңавта



Хор: Вилянина Русмиленко

манас. Щита, тынасты уталтаты хотан, «продавец-заготовитель» рупата щира уталтыйс па мохты Кушеватовской рыбокооп рупитты китса. Щита пенсияя этты унты рупитас.

– Щи порайн муң айлат хоятат, юр ар тайлүв, холта китлаюв, рупитты щи манлүв, – Наталья няхман нумалмийл. – Послов, Кушавт, Асов па Љоркуртан рупитысам. Кимет тынасты нэңат юкана этдысам, хой порайн нянь верты лойдысам.

Елды па, 1971-мет талн Асов курта, айлат эвие хоца нётты пил ху китла. Щит Леонтий Русмиленко. Љын Кунават мува Саңхамкурта рупитты китыдылайңан. Щиты щи пилана йилңан па ияха йи номас понман улты питлаңан. Уншак няврэмлал сэма питты юпийн Љоркурта касалсаңан. Ияха дын, вещьката па ошаңа, вет няврэм энмалсаңан. Наталья Марковна 1995-мет талн пенсияя щутщаты этас.

– Ин, талдал уна ювам порайн, верды лув ищи ант па омасал. Љув катра монщат па арат уйтал. Туса верантал па ёнтасал. Щи тумпийн лув хув сыс мис тайс: творог, асметана па мисвой мисъийңк элты верылдыс, – опел ишакман, апщилал Любовь Кондыгина па Ольга Тасъманова, потарлаңан. – Ай порайн, ашкуда-интернатан улмеван па антев-ащев вулы хотан яңхтэлан, муң иса давлассув, хун Наталья опев ёхатал. Муң шеңк амталдысув, лув муң педаев самаң, иса нётас па нётал. Ин муң уна йисув, хилдыет тайты питсув, ищипа верытлүв опев ими молты верат элты инщасты. Љув иса муңев ям ясаңан нётал.

Там сэма питам хатлаңан, «Ляльн нох питам хатл элты айкел туты нэңев», Хон мувев доват арсыр вошат элты мойлапса ясңатан китса. Тови, еңк нопатты сыс, волаң ёхатты щир антом. Туп кум шитал, хилыңал па няврэмлал мохты лув хощайл, мойлатыя ёхатлат. Ат па елды тумтака, Наталья Марковна, хув нупат ул!

Иван Сандрин ханшам потар

# Водаң Ляль пора арат

Товийн, Водаң Ляль нох питам хатл поста-  
тыйн, каман па кашң ишни элты ляль пора арат  
щацлат. Тамац ар худанттыйн сэм йиңкен этад,  
тур харэн лап манда. Водаң Ляль харатан парам  
па веккеша ушам хоятлув номпса ёхатлат.

Ин ялап удапса щиран арыср нёхты хорат  
этлат. Щиты, кашң тал, арыты акция верла.  
Водаң хон мув сыдтан улты хоятат йи ар арыман  
яха пидтацлат. Нёхты хор вантты па худантты  
порайн, ант па моштада, матты ки арыты хоятлад  
йи тахайн уллат. Тухал ишан па мув сыд хоятат  
тамац акция хоца ищи пидтацлат.

Тампуш, Хон мув куцаев партапса щиран,  
знамты няврэмат «Катюша» ар арыты питлат.  
Рут ясаң уйтты эвет-похат лув рут ясецдан арэл  
арэмалат.

Там лопасан Юлия Николаевна Накова, Елисей  
похад пидан, Кев сыд хантэт ясаң, Геннадий  
Павлович Кельчин па Лорвош хантэт ясаң щира  
толмащам «Катюша» ар пондэв. Хоя маты арал  
сама рахал, щитал луңталан па арыялан.



Хор: Иван Сандрин

## Катюша

Яблонь лыплат, груша  
лыплат похсат  
Ас хуват шуваң пошмат  
мантсат.  
Калнаңала этдыяс Катюша,  
Руваяңаң палад саңхама.

Этдыяс па арал арэмисды  
Степь мувед хопшат  
курэк элты,  
Лув саммасям хорам  
похад элты,  
Письмайдал шавимал  
ху элты.

Ой, наң арэм, эвийе, арым  
Пурда наң саңки най юпина  
Па сядта па ляляң ху хосья  
Катюш элты пайм удам тува.

Лув ант нумман  
нэциел тайдалды,  
Лув ат худал хоты арыял,  
Лув ат мувал самаңа шавиял,  
Катюшайл лувел ант ёрэмал.

Яблонь лыплат, груша  
лыплат похсат  
Ас хуват шуваң пошмат  
мантсат.  
Калнаңала этдыяс Катюша,  
Руваяңаң палад саңхама.

Геннадий Кельчин  
ханты ясаң  
толмащсалды

## Катюша

Йилпидасат дьтот тайты юхат,  
Нави сыв ёхана дарпидас.  
Саңхам сыдна Катя нэмпи эви,  
Пал вурамаң ёхан путарна.  
Эви арл мувал хуват щацл,  
Сывас хорпи ёх пидал эвалт,  
Юраң нэңхэл китыдыты ясаңат,  
Хансапсыдал нумман тайдалды.  
Самна тайты, ханя, эви арэм  
Найем калтам нюхадман, пурда!  
Мувед сайлаты ёх пидэм элты,

Катя эват вуца ёхтапта.  
Хорам эви номсална па ёхтад,  
Сыяң арл щацты питас па,  
Рут мувал аратыты лув юраң,  
Катяядна сам харна тайда.  
Йилпидасат дьтот тайты юхат,  
Нави сыв ёхана дарпидас.  
Саңхам сыдна Катя нэмпи эви,  
Пал вурамаң ёхан путарна.

Юлия Накова ханты ясаң толмащсалды

# Ляль нумман арат па луңтарат ханшал

## Ун Ляль ус

Хув порайна Ун Ляль ус,  
Кашң хота шук лув тус.  
Ведщи энмам ёх няврэмат,  
Щалта еша уна ювам икет.  
Иса хотлад хайсалдал,  
Ляль харыя холдыя мантсат.

Хота холдап, хота ув,  
Хотгэдалд си хайсат лув.  
Ёдан хащам хоятат,  
Ялап щиран улты питсат.  
Имет, уна ювам  
икет, похат,  
Ход рупитты тарам усат.

Хой нэциен сойп талас,  
Тухал нэнен лаңки ведас.  
Маты имет худвой палсат,  
Айлат эвет шумах версат.  
Верам отдал ляля китсат,  
Сэм йиңк, шак йиңк  
пидна понтсат.  
Атаң-хатл, талад-луңал,  
Ляль нох питты ешацсат.

Охаль имем ар вой ведмал,  
Матра имем ар худ тувмал.

Тамара Александровна Пырысева ултал хуват няврэмат уталтас,  
щикут хорам арат па луңтарат нэпека ханшас. Ин кум шитман,  
холна ханшал. Кашң хоятан уйтты «День Победы» нэмпи ар  
ханты ясаң толмащсалды. Ин хоятатан арыда. Ляльн нох питам  
хатл кеша лув ханшам луңтарал луңталан.

Ударнека дьн понамңан,  
Тынаң нэпекна  
дьн мойдамңан.

Ма Леванты акем холна,  
Ар худ ведмал тахайна,  
Си порайна руцна понтса,  
Мевд патэд медальна.

Лув педайл мохет вантман,  
Ищи яма рупитсат,  
Кашң верэл морта версат,  
Муйкем юрдал ёхатсат.

Ма няврэмдам опрацел,  
Кат пуш тэкаптамад  
пландал.

Сит ураңан мевдал понам,  
Сталин хорң медальна.  
Ситы мохет рупитымел,  
Лув Победа шитаптымел.  
Щишан ляль нох  
питам хатлэв,  
Метшак уна муң луңатлэв.

Ялпа энмам няврэмийет,  
Щи Победа шукаң ус.  
Лялясам верат нумман таят,  
Нынан лудан щунь ат ус.

Тамара Пырысева



Хор: popovolegshur

## Ас нопатты пора

Ас нопатты тыдасына касц Овс мув нэңхы дайдаст. Щи порайна Ас педа вантман, камн хорпи ям номпсат ёхтыдылат. Ёхи ёхатман, хансты юх ясна вуйман, хор ханста дьтдан.

Ма ротдам хув йис порайна худ велта нэңхэт одлисат. Номлэм, хоты ацием па амыем Ас сыдна лайсаңан па вантсаңан, хоты ёңкат мандат. Муң ищи няврем порайна, мальчаң сара соматман, ащем па амэм юпина нёхамман маньдысув. Сэңк ищи дайлассув, хунты лувңан холап аматта мандаңан па худ каталдаңан.

Сытам. Щиты еса дайман, ванлэн, ёңкат напатлат. Напатман, ёңкат ал щёвылат. Щи сыят холантэнна, номасна ал ям, щипуляң ям олапсы эвалт номасдан. А ёңкат педа ванман, лув тынаң кеват хорпет! Ид лаңилдылат, нох этыдылат. Най ищалт каман щирна этлилат. Щиты янман мантэт хорпет.

Асув па аматлитыт хорпи. Лув парта веритас ки, щиты долан лавас: «Нявремдам тумтакан ат яңхлат, ёсэл пайды па тумтак ат ол!». Щитна, ма ищи дышем хоща сарнең номсат вусам, Асэм хоща перна пас аматсам, па ям номсат вусам.

Ольга Пандо хансам потар



Хор: Ольга Пандо

## Мувев омщаламан тайлэв



Хор: Ольга Пандо

Вуд кер тыдасына, 24-мет хатлна, муң Охсар похол аскодайна и ям вер ос. Лдтературно-сыяң гостиной – «Щит ма мувем». Онтыты ныңат Алёна Юрьевна Ерёмёнка па Ольга Николаевна Пандо щипер тусцаң.

Нявремат Еремей Данилович Айпин хансам потар луңатсат. Луват ал ант луңатсат, луват холна ям номас вусат. Луңтам потрэл нэмал «Ма мувем холандам».

Хоты рахал мув холанта? Хоты рахал мув щалитта? Мала верта масл, мувув топ дылаң па тумтакан ат ос? Щиты иншасам верат, нявремат аса ямас давадсэл.

Мала хорпи муң емаң мувув ос ки, касаң нэңхы лув хоцел щиты ямас па омщаламан тайсэл, хоты Еремей Айпин хансас. Мала хорпи нэңхы хоща мувув рахты веритл. Мала хорпи нэңхы хоща эвалты веритл. Ант ат мосмалдэл, туңа-щира кул орув. Мал Асув, сыяң ёханув, саймув. Малайи илайна такан потарты, ариты увта ан рахал. Малайи кесына мув карашты ан



масл. Малайи щипки посхат ясна катты ан масл. Щиты иншасам потрат, нявремат аса ямас давадсэл. Па малайи щипи нявремат аса ямас оцлэл. Луват аса кадаңна яңхтытат па худ велты тахаят эвалт олдат.

Щимащ ям номас аса вусэл, муң емаң мувув сыйдал холна хув щатты питлат, вайлуд, щипкилуд, йиңклуд, тормув тумтак олта питлат. Помаципа муң давта питлуд Еремей Данилович Айпин хоща. Щитна щипи, муң мувув холанта питлуд.

Ольга Пандо хансам потар

## Сорашак айкел мощатты ураңан

«Лух Авт» газета кашц лапат йи пуш этлдыйл. Тухал ишан, ёхаттал унты талаң лапат хащал. Щиперан, сорашак айкедат мощатты ураңан, нынан мосал «Лух Авт» поныдыты айкедат «ВКонтакте» па «Одноклассники» хоща мощатыты.

Щипураңан там QR-код мохты доңаты, па муң верыдыты айкелдува ханшлтытыты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел понылдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясцев шавилэв!



### ОБЪЯВЛЕНИЕ

Там QR-код хуват доңаты па вантаты, муйсыр нётосайт СВО хоща улты мохета малайт. Щипу тумпийн нэңдала, няврэмдала, аңкидала па ацидала ищи нётоса вуты рахал.



Полная информация по телефону  
+7 (902) 816-11-90  
+7 (34922) 3-98-08  
Звонок по России бесплатный

**СЛУЖБА ПО Контракту в ВС РФ**

**ВРЕМЯ ДЛЯ ВАЖНЫХ РЕШЕНИЙ!**

**Контрактная служба**  
**6 700 000 Р**  
ЕДИНОВРЕМЕННАЯ ВЫПЛАТА  
**4 000 000 Р**

ПРИ ЗАКЛЮЧЕНИИ КОНТРАКТА НА ЯМЛЕ

ПРИБЛИЖАЮЩИМ из других регионов возмещаются затраты на проезд от места проживания до г. Салехарда. В период оформления проживание в г. Салехарде и 3-разовое питание предоставляется бесплатно.

**ОБУЧЕНИЕ:**

- ✓ операторов беспилотных летательных аппаратов
- ✓ тактическая боевая
- ✓ медицинская подготовка

3 600 000 Р единоразово от региона  
до 120 000 Р ежемесячно по федеральному

400 000 Р министерство обороны  
зачисление военного специального контракта

**ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ в ЗОНЕ СВО** **от 225 т.р**

СУРГУТСКИЙ  
ДИАЛЕКТ

(Олаң шупал № 18 луңталн)

Масай икинэ ши йасэңлал куллал, куллал мунт. Панэ лопка палэкнамхэ ликилнам ши Масай ики төвөнам мән. Панэ мән, мән. Анта қөлө пөтө мөта кимнө йавнели вөл төт. Ши йавнели ұлта тохинө утән рәп. Панэ ши рәп күтөпа төвө қаһахтәх. Мүвө йухи мөрит өнта қаһахтәх.

Көчхил нөқ вәй, панэ ши йух мөрит өнта ләк пөңөла төвө қаһахтәх. Панэ ши лаль өқкө маһи һәлә вәс вәт коптәркинат панэ ши сохәлтөтәх. Ши мунт йәйил – лаль өқкө – йастәм сохит: «Пәстахө йәңқила! Йәмат сорха кирәхлә!»

Панэ ши сохәлтөтәх. Панэ ши рәпи ылнам әсәлмал латнө, ши Масай ики төл сохит рәп күтөпи нөқ лүль. Панэ ши қө өв лүвнө көчхинат илә сәврөми. Өв ылә көрәх. Ши қө пөқәл төвө чөнчөх тохия олтөтәх.

Вәлилал-учлал әй пәләка тувәл. Авлал ләки әй пәләка қаһахтәл. Авлал-вәлилал. Ну, төл сохит ши қота кирәхтәх. Анта, мән.

Қөлөнтәл, тәми ши һүки қот мувты лаль өқкө – әвәс лаль өқкө – һәвмәл:

– Тәм маһәм пә мәрә өнтәм. Мүвликкәхө йәх? Сәмты лопканә күтши.

Моһттә қө: Ши, руть вәлтә лопканә лүв анта вина аллөт, йәңқиллөт.

Өпилнам йастәл:

– Йә-а, тәм маһәм мәрә қөлат йөвөттәл өнтәм. Нүң мөна, мөна, лопканам йәңқила!



Хор: Людмила Айваседа

Панө, анта, кәм питөт. Панө өпил һәлә вәс вәт кәлөңнат китли.

Авләл пултахө вәри. Панө ши йасәң күнтәхләх, ши Масай икинә һүки қот мувты йасәңт-көлөт кулат. Панө әй ши мунт ши қаһахтәм тохила мән.

Ши йәвнөт унчө ылнам әсәлтөтө рәп. Панө ши рәп күтөпа опятә өс төвө әлонтәх, төвө қаһахтәх. Лаль өқкө өпи вәлийат пули, ши һәлә ли, вәс вәт кәлөңнат пули. Панө тәқа ши сохәлтөтәх, ши лаль өқкө өпи, вина кәнччәхө.

Панө ши рәпи әсәмтәмал латнө, ши Масай ики нөқ лүк. Ши көчхилнат ши ими өв илә сәврөмтәх, сапәли. Увәл әлө илә төвө қәтәл. Па ши өс ши ими пөқәл лөһщ өнта лөттөтәх. Вәлилал-учлал, әвәллал йира тувәл, ылә чөвийәл. Панө өс қота мән. Қотнө қөлөнтәл. Ши лаль өқкө имилнат қытхән.

Ши Масай ики иминат қыт. Лахләксәмин, өмәсләхән. Энт-эм ши өпил пә, вина кәнччө өпил пә, йөвөттәл мәрәхө анта йәх. Йөвөттәл вичө пә өнтәм. Лахләксәлхән.

Ши лаль өқкө имилнам, ши Масай имином йастәл:

– Йә-а, мөна, нөқ ләйлә кәм тохи, тәм өпәм әттәл өнтәм. Мәра қөлат пә мән.

Ши ими кәмнам мән. Кәм йөвөт. Панө Масай ики һәмәликкә төвө ванхө лүль, панө мөләхмин ши имилнам йастәл:

– Вөлә, мүвөли вәрөнтөхтәх? Мүвә вәрөнтөхтән?

Ши ими йастәл:

– Вот, ләк ләйәлтахө китөйөм.

Ши өпилат лахләксәл. Вина кәнччө өпилат лахләксәл.

Ши латнө Масай ики йастәл:

– Йә-а, мөтапи тытам, мөта тытәм вәрли? Қөлнө ши лаль өқкө кәм пахтөптәли? Ши имил йастәл:

– Мәқа лаль өқкө йөмат пәлөл, йөмат нүңатыйи пәлөл! Ши ләхәрнат мүварит анта қәтәлхө, вәс атхө йәх. Йөвин ши ләхәр илә өнтө вөлтөх, қәтлин ши ләхәр илә өнтө вөлтөх. Шитнат әлал.

Ши Масай ики йастәл:

– Йә-а, мөта тытам һәмләхтә! Өлөң ләхәр илә вөйтөх. Илә вөтахө пиртә! Шит ләхәр илә вөл күнтө, ма лүват пахөтлөм. Ләхәрнат йә қөйәхинө вуйи. Пәләккә тәм пар пахөтлөм.

Па, ши ими қота пәрхи мән, һүки қота. Ши лаль өқкөнәт әллөхән-өмәсләхән. Ши ими йастәл:

– Йә, ши өпә пә өтө төвө өнтәм әттәл.

Панө иттәнхө йәх. Әлонтәхө мүртахө йәх. Ши лаль өқкө па ши әлонтәхө раһипөх. Әлтө тохихәннө. Панө ши ләхәрнат әлонтәл. Әлонтәхө мәчипөл.

Ши ими йастәл:

– Йә-а, тәми мүв арит атхө-қәтәлхө йәх? Мант, вөлә, имихө вөйөн. Ши ләхәр мүват илә өнтө вөлә? Мин вөлә әйқа вәллөмән. Икихән-имихән сохит қөлхә өнтө вөллөмән.

Ши ики, лаль өқкө йастәл:

– Йә, щәқа, пәләккә тө ши Масай ики тәм лаль йәхләмнө вәли. Мүв йөңкнө чикән? Тәхө пар тәм қырөмтәл!

Ши ими йастәл:


– Йә-а, мүв төрмәли кирәхләл? Әй ши киврия ләң күнтө. Мүв төрөми әтәл? Мәқа ши ләхра илә вөйә! Әлонтә мурта йәх.

Мөта мәрәли умәс лаль өқкө, йастәл:

– Әнтөқа пә чөпәңқа, әнтөқа! Тәм ар мөта атхө-қәтәлхө йәх. Лилөң вөл күнтө, анта, қөвин әтәл тәхө.

Йә-а, панө ши ләхәр илә вөйтөх. Әсса әлонтә мурта йәх. Ши имил әлтө тохия вәр. Панө ши әлонтәмин латнө, өс ши қөнә, ши лаль өқкөнә, ләхәр тәхө пөңөла пәны. А ши Масай ики һүки қот пытөр кәм пәләкнө өмәсл, қөлөнтәл. Қөлөнтәл, а-а, әлтө тохи вәрхән, панө ши әлонтәхән.

(Еллы па ул)

Аграфәна Сопочина  
ханшам потар

Хон мувев доватан, ун кер тыдац 30-мет хатадн, тут хуратты хоятат емаң хатлэд постасэл. Щимац рупитты хоятат кашң ун па ай вошатан улдат. Щи каркам хоятат рупата водаң ант ныда. Туп хун атом вер, тут султам питтййн, лув сора, мет одңа ёхатлат.

# Тут хуратты ёх емаң хатл

Там емаң хатл постаты ураңна, 1999-мет талн Россия мувев куца Борис Ельцин, партапса ханшас. Аратл па мир доватан, тут хуратты ёх емаң хатл Ас нопатты тылац 4-мет хатадн постада.

Ун кер тыдац 30-мет хатадн 1649-талн, Россия хон ики Алексей Михайлович мет одаң нэпек лэцатас, хота ханшман ус, хоты мосал тут хуратты щиран атаң-хатл рупитты. Щи пора элты там лаварт па шеңк мосты рупата ямашак постаты па лэцатты питса. Емаң хатлэд 377 тада йис. Рупиты ёх ям ясаңан ястасайт, ишак нэпекатан па мевал посатан юкантсайт. Ханты ёх кутан, тамац мосты рупатайн, ищи ар хоят рупитал.



Хор: ушаюги



Хор: Иван Сандрин

## Ай пора элты уйтты рупатаем

Щиты Россия МЧС внутренней служба сержант Андрей Олегович Тыликов ястал. Лув курк тыдац одаңмет хатл 2021-мет тал элты Пулңаватан тут хуратты щиран рупитал.

– Ма 1997-мет талн Овкуртан сэма питсам па щита энампсам. Овкуртан ищи пожарной часть ул. Ма тохи ай пора элты лоңтысам, – Андрей Тыликов ястал. – Щита ма акаем, Артём Тыликов, рупитас. Щишан ма ван кутан лув хоцайл яңхилдысам па вантысам, лув рупатайл муй хорпи. Рупитты хоптандал лумтыдыслам па машина дыпия омпсылдысам. Ищи нумассам, хун энамлам, акаем иты рупитты питдам. Ин щи номпсэм елды тулэм.

Пора сора хацас, Андрей энмас. Ашкудайн уталтыман, юраңа йиты ураңна, арсыр ка-сапсаята яңхас: ухал шоппи наврас, тынщаң ёвлас, хухатлдыйс,

Хор: Андрей Тыликов



волейбол па баскетбол щиран ёнтас. «Патриоты Сыни» нэмпи командая лоңман ус, ар тахаята касты яңхас па ар пуш нох питыдыйс.

– Ма 2015-мет талн Овкурт ашкудал етшаптасам па мохты Хон Петра воша уталтыты мантсам. Щита «Пожарно-спасательной колледж» хоца центр подготовки спасателей ул. Велци уталтыты питсам па кимет талн солтана китсайм, – Андрей Олегович потартал. – Щалта 2017-мет талн ёхлы

уталтыты тахаема ёхатсам па 2019-мет талн лувел етшаптасэм. Елды па, щитадан, мохты заочной щиран, уншак тахая уталтыты нэпеклам китсалдам па Пулңавта мантсам, «Ямалспас» хоца рупатая лоңксам.

Щита лув кат тал рупитас па 2021-мет талн тут хуратты тахая рупитты вохса. Яма па вещьката рупитты ураңна, каматса тал хащаман, одаңмет пожарно-спасательной часть отделение куца унты эдатса. Холна тал шуп рупитмад юпина па ношак эдатса. Ин лув Пулңаватан одаңмет пожарно-спасательной часть караул куца хоца нётты лаңкар хоята понман рупитал. Тунял, Россия МЧС элты «За заслуги» нэмпи мевал посан, мойлаптаса.

Там хащам емаң хатадан, Ямал мув губернатор тут хуратты хоятлуд хоца ёхтылдыс па яма рупитам ёх мойлаптасды. Щи кутан, Андрей Тыликов нэмад па щацас. Лув «За спасение на пожаре» нэмпи мевал посан юкантаса.

Хун Андрей тамац рупата щира уталтыты питас, иса антедан ям ясаңан ястылдыса па потартылдыса. Ин похиел яма рупитты



Хор: Андрей Тыликов



Хор: Андрей Тыликов

ураңна антел иса амтатлдыйл. Щишн, Андрей Тыликов ястал: «Антием ястам ям ясаң нумлэм, рупатаем самаңа тайлэм па кимет рупата манэм ант мосал!».

Иван Сандрин ханшам потар

# Няврэмиег емаң хатл постасат

Щалта ши, нарасьюх сыйт цацты питсат. Мойң хоятат омаслат, вантлат. «Лонц сэмие» группая яңхты тюпаң пошхиет, шоврыет иты каш альты норма ким дарэмасат. Руц па ханты ясаңан арат арысат. Луңтарат луңатсат. Нови ернасатан донц сэмиет иты дарысат. Щалта па йи аңки хут эви пидан ханты як яксат. Юхат ши эвиет, думтам ернаслад альман, хорамаңа карыман, каш верты нормам хуват шушилдысат.

Лариса Васильевна Муслимова (Куртямова) хатл сыс шавиты няврэмлада па каш вантты ёхтам мойң хоятата ханты улапса элты потар тус. Муй хорпи хорамаң па хошам думтам сох хантэт тайдат? Муй циран ернас ёнтла, хоты лув хорамаңа? Муй хорпи ханшет улдылат, муй нэман понман улдат па маты ханши холта ёнтты рахал? Щит элты потрал манас.

Потар хулантты сыс няврэмиег еша щутсасат. Юхат ёхтам рут хоятлад пидан эвиет-похиет верантты хот ята вохсайт. Эвет ернас думтылым тумпийн, Лариса Васильевна холна аканя ёнтам ай ернасыет ёхтам мохилада аляс. Кашң няврэм лув ёшадан ернас катадсалды, кератман яма вантсалды. Щалта нэпек элты эвтам хорат оляпан нёсытты омассат. Хоя маты оляп сама хойс, щимац оляп пирысат. Верам рупатайдал аңкилала-ащилала эталдаслад па ванттыя нох тахартсайт.

Там йисан Овс мувеван тэдыя ёхтам хоят. Талаң хоттэлатан муң мув сылдув педа касалдат. Муй рут мир хоятат тата улдат, щит элты нэмолты ант уйтлат. Тухлат, унал-аял руц ясаңан потартты ант хошлат. Ванты, муң мувева улты ёхатсаты, муң улапсаев ици шавиман таядан. Щит ураңан, ай няврэмлад пидан, ун хоятлад ици ат уйтлат, оша пайтлат па елды нумман ат тайлэд муй хорпи рут мир хоятат тата улдат.

Зоя Куртямова ханшам потар

**Хон мувев шимдаң мир хоятат емаң хатл поста-  
тыйн, Лапатнаңк вошаң ай няврэмиег ици тохи  
пилтацсат. «Эдейко» нэмпи ай няврэмат хатл сыс  
яңхты хотан уйтантопса манас. Ши хатадан аңкет-  
ащет, ун ащет, ун аңкет няврэмладан-хилдыладан  
лэщатам каш вантты вохсайт.**



Хор: Лариса Муслимова

## Газета

«ЛУХ АВТ»

Адрес редакции:  
629003, ЯНАО,  
г.Салехард,  
мкр. Богдана Кнуянца,  
д. 1, каб. 106  
+7 (34922) 4-68-63

E-mail:  
luh.avt@yamal-media.ru

## Учредитель

Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д. 9, каб. 708)

## Газета зарегистрирована

Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

Тираж 1300 Заказ 162 тз

Подписные индексы:  
на год – ПА700, на полугодие – ПР561

№ 19 (1322)

Газета вышла в свет 9 мая 2026г.

Подписано в печать 7 мая 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,  
в розницу не распространяется

## Издатель

Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кнуянца, д. 1, каб. 106

Фактический адрес: 629007, Ямало-  
Ненецкий автономный округ, г. Салехард,  
ул. Чубынина, д. 39А

И.о. генерального  
директора  
АНО «Ямал-Медиа»  
Хатанзейский Олег  
Геннадьевич

Главный редактор  
Яковлева  
Аллина Кирилловна